

Bekalan air di Melaka mencukupi

Norafiqah Jamal

AYER KEROH - Bekalan air bagi Negeri Melaka menjelang sambutan Hari Raya Aidilfitri awal April nanti dijamin mencukupi dan tidak terjejas meskipun negara kini dilanda cuaca panas atau fenomena El Nino.

Exco Kerja Raya, Infrastruktur, Kemudahan Awam dan Pengangkutan negeri Datuk Hameed Mytheen Kunju Basheer berkata, ia memandangkan bekalan air di semua empangan utama Melaka masih mencukupi dan mampu bertahan sehingga Jun.

Hameed berkata, setakat 21 Mac paras air di Empangan Durian Tunggal adalah sebanyak 80 peratus; Empangan Jus sebanyak 95.7 peratus dan Empangan Asahan sebanyak 95.5 peratus.

Justeru, Hameed berkata, setakat ini tidak ada keperluan untuk melaksanakan catuan, namun Kerajaan Negeri telah dan sedang melaksanakan pelan kontigensi bagi mengatasi penyusutan paras air di empangan kesan fenomena El-Nino.

"Antara yang sudah dilaksanakan adalah mengepam 47 juta gelen air sehari dari Sungai Grisek, Muar, Johor ke Empangan Durian Tunggal, Kerajaan Negeri telah memohon tambahan sebanyak 12 juta gelen dengan kebenaran Kerajaan

Negeri Johor.

"Pengepaman 15 juta liter sehari dari Tasik Ayer Keroh ke Sungai Melaka melalui Sungai Anak Ayer Padang Keladi; Pengepaman air lima juta liter sehari dari Kolam Kesang 1 ke Sungai Melaka.

"Melepaskan air dari Empangan Jus melalui 'draw off tower' bagi meningkatkan paras air Sungai Batang Melaka untuk pembekalan Loji Air Gadek; Melepaskan air dari Empangan Durian Tunggal ke Loji Air Bertam dan Loji Air Bukit Sebukor," katanya.

Beliau berkata demikian pada sidang media selepas mengadakan lawatan tapak di Tasik Ayer Keroh, yang turut disertai Timbalan Exco Kerja Raya, Infrastruktur, Kemudahan Awam dan Pengangkutan negeri, Zahari Abd Kalil; Pengarah Badan Kawal Selia Air (BKSA) negeri, Azizul Adzran dan Ketua Pegawai Eksekutif Syarikat Air Melaka Berhad (SAMB), Ir. Norhisham Abu Talib.

Mengulas mengenai penyusutan air di Tasik Ayer Keroh seperti yang tular di media sosial, Hameed menjelaskan ia bukanlah disebabkan cuaca panas melampau, sebaliknya disebabkan pengepaman air dari tasik berkenaan ke Bunded Storage Empangan Durian Tunggal.

Ujarnya, pengepaman itu kemudiannya akan disalurkan ke Loji



HAMEED bersama Zahari ketika mengadakan lawatan ke Tasik Ayer Keroh susulan foto tular menunjukkan kawasan berkenaan kering didakwa akibat cuaca panas melampau.

Rawatan Air Bertam yang mana ia biasa dilakukan bagi mengawal paras air di empangan utama negeri ini.

"Bagaimanapun, pengepaman

itu sudah ditamatkan dan kini proses pengambilan air melibatkan Sungai Kesang pula. Jadi masalah tasik kering itu bukan disebabkan isu cuaca seperti yang diperkatakan.

"Lagipun, kita masih mempunyai banyak alternatif kolam tadahan lain, antaranya Tasik Biru yang masih belum digunakan sepenuhnya," katanya.